

Premier mr. Mike Eman:

Dialogo Social a trata tema di Husticia y Seguridad

ORANJESTAD (AAN) – Matutino DIARIO a acerca Prome Minister mr. Mike Eman, relaciona cu e continuidad di Dialogo Social, unda cu e organizacionnan concerni a reuni e siman aki pa trata e tema “Husticia y Seguridad”.

Premier Eman a menciona cu tabata tin hopi reunion tocante e tema aki, y na dado momento despues di a acumula cierto datonan di e partnernan, y esnan cu ta encarga cu husticia den nos pais, a pidi algun experto riba e tereno aki pa produci un documento riba kico nan ta aconseha cual ta e mehor pasonan pa tuma pa futuro, pa sigui fortalece e seguridad di nos pais, y crea tambe forman nan nobo di seguridad y cooperacion, entre e entidadnan manera Douane, Imigracion, Ministerio Publico y Polis, cu ta traha riba e tereno aki.

Esaki tabata un trabao grandi y e rapport aki a keda presenta tambe y a base di dje a destila for di tur e gremionan sindical y comercial, y tambe di gobierno aspectonan cu mester haya atencion inmediato.

Prome Minister a indica cu hopi enfasis a wordo poni riba proteccion di nos fronteranan, riba mehoracion di seguridad pa nos hobennan, unda tin un trabao grandi pa haci door di schoolnan, mayornan, barionan, pa mehora e estructura pa asegura cu e hobennan ta keda riba e trayecto corecto.

Tambe e parti di deporte y recreacion ta hunga un rol den esaki y pa tal motibo ta importante cu den e reunion cu tabata tin diaranzon awor, hopi di e temanan cu ta aparece den e rapport ta wordo discuti.

E dignatario a expresa su deseo pa den e reunion aki ta mas cerca di un protocol unda por acorda entre tur e partnernan, kico ta e temanan cu mester haya prioridad na momento di papia riba



seguridad y husticia den nos pais.

Prome Minister a señala cu esaki ta un tema cu cada bez ta evoluciona mas y cada bez e gruponan riba cual-

nan tin mas preocupacion ta cambia, pero e realidad evidente ta cu tin un compromiso grandi di e sociedad pa hunto atende cu tur e retonan di seguridad.

E mandatario a señala cu e ta spera cu e rapport cu ta bay sali for di e reunionnan aki lo crea mas union y cooperacion entre e entidadnan cu ta percura pa e seguridad

den nos pais.

E dignatario a recorda cu tempo di e gobierno di sr. Henny Eman y sr. Watty Vos, tabata tin cierto acuerdonan pa proteccion di frontera, entre Douane, Imigracion, Warda Nos Costa y Polis.

Premier Eman a agrega cu esaki cu tempo a cambia di caracter, y hopi ta esnan cu ta desea di bolbe mira un tipo di cooperacion asina pa cera mas nos fronteranan, entre Warda Nos Costa, Kustwacht, FOL di Merca, cu ta yuda cuida nos isla for di un area turbulento y cu hopi reto. El a subraya cu minister di husticia cu su expertonan tambe ta den e reunion locual ta un aporte importante pa por yega na conclusionnan riba puntonan hopi concreto, pa por traha riba nan.

NUNCA PERDE SPERANZA!!

